

■ COLUMNA

Culaischen, giat e clavazin

DA GISULA TSCHARNER*

Tge che quels traits han da cuminaivel? Fitg bler, numnadain: Els èn mes animals da chasa, ils quals vivan cun mai, spetgan sin mai, han pazienza cun mai, dattan adina resposta, cur ch'jau communitesch cun els. Els na fan naginas reproschas, na cumondan mai – e tuttina èn insaco pli gronds che nus, che jau e mes partenari. Els san dapli che nus, els pertgiran la chasa sezza sco er il denturn cun ina gronduna cumpetenzza e charezza.

L'amicizia da mai e mes traits animals da chasa na sa lascha strusch descriver cun plets; però a mintgin dad els vulesch jau deditgar curt intgins patratgs.

Mes clavazin stat dapi 40 onns en nossa stiva, ed el vegn sunà surtut da mai, di per di (u notg per notg), sa preschentond cun sia vusch er ad amis ed esters. Vi da la paraid encunter ordadora stat el, tranter isch-balcun ed ischistica e cun quai savens en il current d'aria, schizunt en currents extremis dal clima criv da Veulden, e tuttina: El n'ha mai patì da quai, ses bellezza tun da Steinway emplenetscha l'entira chasa e tut ils cors. Mintgatant er il spazi da la strada chantunala sut la chasa, cur ch'jau fatsch musica da chombra cun collegas, avrend la fa-



nestra per avair aria avunda.

El ha propi sa laschè domestigar, noss char clavazin. Ed el survegn ina tgira regulara; mes um Angelo emplenetscha di per di ils svapuraders per mantegnair l'umiditad necessaria. Autramain savess rumper la paraid da resunanza (or da lain), atgnamain la «spina dorsala» da noss char animal da chasa.

Ames clavazin sai jau raquintar tut, er grittas, temas, solitariadad, ed el dat adina resposta, el regala almain in pau musica.

Noss giat è anc giuven, el ha in onn. Tuttina ha quest animal da chasa emprendì aifer curt temp tut quai che s'auda tar ina relaziun persunala cun nus e cun nossa chasa. Jau sai uss er, nua ch'el ha gugent sch'ins charsina ses venter.

El sez sa exact, co ch'el ha da tractar mintgin,

el enconuscha ils characters e basegns individuals, el ha chattà ses dachasa, ses amis ed inimis, ses revier. Er el fa part da la famiglia.

Il culaischen en l'iert è il pli vegl da noss animals da chasa, el ha radund 50 onns. Sia feglia transparenta sa muventa cun in plachair legher e charin, igl è in scutinim en in cuntin, e per guardar or da fanestra èsi sco «sound per ils eglis». Nossa figlia fascheva termagls cun poppas en sia pitschn'umbriva; alura vev'el 10 onns, noss animal da chasa, il culaischen. Oz, 37 onns pli tard, stat el sco in retg sin il palc, mussond sia bellezza e dominond l'atmosfera da la vischinanza. La puma-chaura dad uonn è pli blera e pli bella che mai. Il culaischen scutina novs receipts en mias ureglias, cur ch'jau sun vi dal cleger sias coclas.

Avant in pèr dis ha el già in grond accident. La nevaglia da fin-settember ha fatg gronds donn, stgarpond giu er entirs roms plain puma – i fascheva mal da guardar or da fanestra. El è sa disgrazià ed ha pers sia bellezza, ma noss' amur envers il culaischen, noss animal da chasa, stat, crescha schizunt anc.

***Gisula Tschärner è spirituala libra en pensiun, stat a Feldis/Veulden. El la viva e lavura cun las plantas selvadias en ed enturn la vischinanza.**